

TIMOR-LESTE NIA FRONTEIRAS MARÍTIMAS HO INDONÉZIA

Timor-Leste ho Indonézia iha relasaun ne'ebé forte no sai ona ezemplu global ba rekonsiliaun no amizade ne'ebé konstrutivu. Timor-Leste ho Indonézia ne'e nasaun viziñu ne'ebé fahe rai no tasi, ba norte, loromonu no lorosa'e.

Hafoin hakotu tiha konsiliaun obrigatória ne'ebé susesu ho Austrália no asina tiha Tratadu Fronteira Marítima, ne'ebé estabelese ona fronteiras marítimas permanentes iha Tasi Timor, Timor-Leste haré fila fali ba nia fronteiras marítimas ho Indonézia.

Tratadu Fronteira Marítima entre Timor-Leste ho Austrália ne'e hateten ho momoos katak sei la taka dalan ba negosiasaun entre Timor-Leste ho Indonézia nian; nia fó dalan ba negosiasaun bilateral ne'e, atu lao ho livre.



Tanba sa mak fronteiras marítimas ne'e importante tebes ba Timor-Leste?

Estabelese fronteiras marítimas permanentes ne'e hanesan prioridade nasional ba Timor-Leste, hanesan hakat ikus hodi hametin Timoroan sira nia soberania nu'udar Estado independente ida. Ba Timoroan sira, asegura sira nia direitu ba nasaun nia tertóriu marítimu ne'e hanesan luta ikus ba sira nia luta naruk ba soberania no independénsia. Fronteiras marítimas sei fó dalan ba Timor-Leste hodi bele explora no dezenvolve rekursu petróleu no peskas, fó dalan ba negósius no investimentu, hodi aumenta tan ba reseita rekursu no fundu soberanu nian, fundu ne'e hodi harí Timoroan sira nia futuru ne'ebé diak.

**FIXA
INFORMASAUN
2020**

Aprende tan @ www.gfm.tl ka kontaktu:
Gabinete Fronteiras Marítimas
Konsellu ba Delimitasaun Definitiva ba Fronteiras Marítimas
Governu Demokrátika Repúblika Timor-Leste
e: info@gfm.tl tel: +670 7742 5544



**Gabinete
Fronteiras
Marítimas**

Indonézia hafahe ona nia fronteiras marítimas ho nia viziñu sira seluk ka, lae?

Indonézia hanesan Estadu arkipélagu bo'ot liu iha mundu, ho nia illa liuhusi 17.000. Nia iha fronteiras marítimas ho Estadu sanulu sira seluk. Indonézia konkorda tiha ona ka konkorda parte balu ona kona-ba nia fronteiras marítimas ho Malázia, Austrália, Tailândia, Singapura, Índia, Papua Nova Guinea, Vietnam no Filipinas. Ho viziñu sira ne'e, Timor-Leste ho Palau mak nasaun rua ne'ebé Indonézia seidak iha akordu fronteira marítima ida no nia hahú ko'alia ona ho nasaun rua ne'e.

Progresu negosiasaun fronteiras marítimas ho Indonézia ne'e to'o iha ne'ebé ona?

Líderes Timor-Leste no Indonézia nian konkorda ona iha Agostu 2015 hodi hafoun no haluan tan diskusaun, kona-ba fronteiras tasi no rai nian. Timor-Leste hahú ko'alia ho Indonézia hodi hafahe fronteiras marítimas iha Setembru 2015. Rai sorin balu ne'ebé seidak rezolve ne'e Estadu rua ne'e sei finaliza iha tempu badak nia laran.

Konsultasaun dahuluk kona-ba fronteiras marítimas, Indonézia ho Timor-Leste dezenvolve hamutuk ona matadalan prinsípios no planu servisu ba negosiasaun nian. Estadu rua ne'e iha kompromisu hodi negosia fronteira marítima permanente tuir lei internasional, liu-liu UNCLOS.

Hahú hala'o ona reuniaun preliminaría entre Timor-Leste ho Indonézia iha 2018 iha Bali no iha 2019 iha Singapura. Maibé, pandemia global COVID-19 la fó dalan hodi hala'o diskusaun formal ne'ebé sei hahú bainhira situasaun diak fali.

Xefe Negosiador, S.E. Kay Rala Xanana Gusmão, mak reprezenta Timor-Leste hodi hala'o negosiasaun sira ne'e. Reuniaun téknika sira to'o oras ne'e hametin tiha ona fundasaun ida ne'ebé forte hodi prepara ba negosiasaun formal.

Kestaun saida deit mak estadu rua ne'e prezisa rezolve?

Kestaun sira ho Indonézia ne'e komplikadu liu kompara ho Austrália. Ida ne'e tanba Timor-Leste iha área marítima barak liu ho Indonézia. Inklui pontu hirak tuir mai ne'e:

- iha kosta Sul, prezisa halo negosiasaun kona-ba fronteira marítima ida ba loromonu no lorosa'e. Segmentu rua ne'ebé Estadu rua ne'e prezisa tetu ho didiak;
- iha Norte, iha Oe-Cusse ne'ebé hamosu kestaun espesial tanba Indonézia mak haleu;
- iha mos tasi husi Batugade to'o Atauro, liu ba Wetar no tesik to'o ba Jaco.

Segmentu hirak ne'e hamosu kestaun legal ne'ebé komplikadu tuir lei internasional. Timor-Leste ho Indonézia prezisa servisu hamutuk hodi bele estabelese sira nia fronteiras marítimas permanentes.

FIXA
INFORMASAUN
NOVEMBRU
2020

Atu hetan tan informasaun bele kontaktu:

Gabinete Fronteiras Marítimas

Konsellu ba Delimitasaun Definitiva ba Fronteiras Marítimas
Governu Repúblika Demokrátika Timor-Leste
info@gfm.tl
+670 7742 5544



Gabinete
Fronteiras
Marítimas